

et de leur compaignie et haudir leur compaignie suspecte. Car pierre alphiuises
 dit. Ne racompaignez en voye a nulle personne se tu ne la cognois deuant. et si
 sacompaigne avec toy sans ta voulente et enquier de ta voye faing q tu veulx
 aler plus que tu nas propose. et si porte lace si te tiens a la destre. sil porte espee
 tien toy a la fenestre. Apres garde toy sagement de tous ceulx des quelz con-
 seille ie tay dessus que tu dois eschiuer et fuir. Apres garde toy en tel maniere
 que pour la presumptio de ta force tu ne despriseroies point ton aduersaire tant
 que tu laysses tes gardes. car sages homs doit tout doubter especialment ses
 ennemis. Et salomon dit. Bien cureulx est celuy qui tousiours se doute. car
 celuy qui par la durte de son cueur et de soy a trop grant presumption mal luy
 venra. Tu dois doncques doubter tous agais et toutes espies. car selo ce que
 dit seneque. Qui en tout doute en nulle ne chaira. Et encoires dit seneque. Le
 sage qui doute eschiue tous maulx. Et iacoit ce quil te soit semblant que tu
 soies bien seurs et en bie seur lieu. toutseuies tu dois tousiours haudir dili-
 gence de toy garder. Car seneque dit. Qui seur se garde na doute de nul peril.
 Apres tu te dois garder no pas tant seulmet de ton grat et fort ennemy mais
 de tout le plus petit. Car seneque dit. Il apptiet a homme bien enseigne quil
 doute son petit ennemy. Et ouide ou liure du remede damours dit. La petite
 mire occit le grat tozel. et le chie qui nest pas moult grat retiet bie le sanglier.
 Toutseuies tu ne dois pas estre tant douteux que tu te doubttes la ou riens
 na a doubter. Car il est escript. Aulcunes ges ont enseigne eux decepuoir. car
 ilz ot trop doute que on les decupt. Apres te dois garder de venin et se te dois
 garder de la compaignie dung moqueur. Car il est escript. Avec le moqueur
 nayas compaignie et fuis ses paroles comme le venin.

Quāt au secōd point au quel diēt les sages que tu dois garnir ta mai-
 son a grat diligēce ie voudroie bie scauoir cōme tu entēs ceste gar-
 nison. Je dit melibee lentēs ainsi q ie doy garnir ma maison de tours
 de chasteaux deschiffes et daultres ediffices par les quelz ie me puisse garder et
 deffendre et pour cause des quelz mes enemis doubtēt approchier ma maison.
 Lors prudēce respōdit. La garnisō des tours haultes et des grās ediffices ap-
 pertiet aulcunefois a orgueil. apres lō fait les tours et les grās ediffices a grat
 traueil et a grat despens. et quāt elles sont faictes elles ne valēt riēs se elles ne
 sont deffendues par sages et par bōs amis loyaulx et a grās missions. et pource
 saches que la plus grant garnison et la plus fort que vng riche homs puisse